

# 南洋華僑殖民偉人傳

## 本論

### (一) 殖民蘇門答刺島者

開關舊港首領梁道明，廣東南海縣人。

蘇門答刺島與馬來半島隔一海峽。元時，海外入貢諸國，有蘇木都刺，亦作須門達那。明初入貢，謂之蘇門答刺，音轉爲蘇門答臘。爲蘇文答刺，爲須文達那。永樂間，鄭和至其地，前王弟來襲，和勒兵擒之，俘以歸。萬曆以後，改國名亞齊，今又譯作亞珍，實皆一國。在本島西北境，土地較大，故世以蘇門答刺國名爲全島總名。島之東南，爲舊港，今亦名巨港，卽六朝宋武帝梁武帝時屢通中國之于佗。

利國。唐以後改名三佛齊。天佑元年，復貢方物。至宋世，仍修貢不絕。明洪武三年，遣使詔諭其國，嗣是屢入貢。時爪哇方強，威服三佛齊而役屬之。九年，三佛齊王卒，子嗣位。明年，請命于朝，蓋欲倚大國爲援也。太祖命使臣齎印敕，封爲三佛齊國王。爪哇邀殺朝使，旋破三佛齊據其國。三佛齊故都名渤淋邦，即今之巴鄰傍，自爲爪哇所破，改名舊港，以別於爪哇島之新村。當時俗稱吉邦者是也。三佛齊既亡，國中大亂，爪哇亦不能盡有其地，華人流寓者，往往起而據之。

梁道明久于其國，閩粵軍民泛海從之者數千家，推道明爲首，雄視一方。爪哇終無如之何。華僑得安居無恐，道明之力也。會指揮孫鉉使海外，遇道明子，與之俱來。永樂三年，成祖以行人譚勝受與道明同邑，命偕千戶楊信等齎敕招之。道明與其黨鄭伯可入朝，貢方物，受賜而還。四年，遣從子解政來朝。蓋南洋華僑能以匹夫崛起而得衆心，握外國君主之權，使祖國增一殖民地者，自道明始。據明史所載，道明雖未嘗稱王，實與王無異，今謂之首領，乃紀其實云。

同時廣東人陳祖義，亦分據舊港之地爲頭目。永樂四年，遣子士良來朝。祖義才德皆不如道明，雖朝貢而爲盜海上，貢使往來者苦之。五年，鄭和自好望角還，（鄭和僅至非洲東岸之竹步并未至好望角。此有誤。）遣人招諭祖義，僞應而潛邀襲。有施進卿者告於和，祖義來襲，被擒獻于朝，伏誅。

時進卿適遣壻邱念誠朝貢，命設舊港宣慰司，以進卿爲使，錫誥印及冠帶。自是屢入貢。二十二年，進卿子告父訃，乞嗣職，許之。洪熙元年，遣使入貢，訴舊印爲火燬，帝命重給，其後朝貢漸稀。進卿亦一豪傑，然地小力弱，服屬爪哇，僅能自保，遠遜道明。故今僅附道明傳後。（據明史瀛涯勝覽東西洋考）

舊港番舶長張璉，廣東（潮州）饒平縣人。

張本大盜，明嘉靖末作亂，擾廣東江西福建三省。西籍言嘉靖間，有海寇張士流奪據葡人之澳門，殆卽璉也。（詳下文）中國人之勝西人自是始。璉後爲官

軍剿平，已報克獲。萬曆五年，商人詣舊港者，見璉列肆爲番舶長，漳泉人多附之，猶中國市舶官。蓋璉雖不稱王，實握王權矣。

三佛齊故俗，下稱其上曰詹卑，猶國君也。自明初爲爪哇所破，大酋移居他境，號詹卑國。其故都舊港，分轄於梁道明施進卿。張璉距梁施二氏二百餘年，中間事跡無攷，不知舊港主權果奪自土酋，抑奪自二氏之裔耶？（據明史通鑑及西史）

(二) 殖民菲律賓者

開闢呂宋西境首領李馬奔，李福建泉州人也。中國人民能以一私人之力與歐洲強國爲勁敵者，後有順治時鄭成功之於荷蘭，前有嘉靖時張璉之於葡萄牙，介其間者則萬曆時李馬奔之於西班牙及葡萄牙也。馬奔固海盜巨魁，從海上掠得帆船之來自馬尼刺者，詢悉其形勢，因以捕虜爲嚮導，率師船六十二艘，水陸兵各二千，婦女千有五百，進征菲律賓。